

3. Alphornkurswoche in Schwellbrunn vom 24. bis 29. Juli 2017

Zum dritte Mol sind mir scho wieder hier, bloosent Alphorn, trinke Bier- und, wie wenn eus keis Johr vo Schwellbrunn trennt, hämer die erschi Nacht selig guet pennt.

Natürlich si mir au do zum Bloose: es C ganz fin, tüent ihm no loose !
Denn no es E, es B, es D, de Ohre tuet das mengmol weh.

Im Störchli gits en lady Spiess; im Rössli denn dr Alpebitter fliesst.
Und dusse strömt en guete Räge; dr grosse Tröchni isch's en Säge.

Mir üebe im Saal vo dr Harmonie. Crescendo, Piano, wo bliebet die?
Bisch selber schuld, wenn d'an Aaschlag chunsch: Im Pianobloose- do liet d'Kunsch! Denn chasch bloose dr lieb lang Tag us, hesch gueti Tön und gnüegend Pfus.

Dr Pfus längt sogar no zum eis Singe. Eusem tolle Chörli wird's gelinge ,
bi eusene Uftritt d'Lüt z'erfreue und de Blöser e Pause z'gäh zum leue.

Spiessli, Cordon bleu und Fondue zum z'Nacht – in fröhlicher Runde wird viel gelacht
Vergässe werde alli technische Sorge. Denne stelle mir eus erscht wieder morge.

Dusse tropfet s'küehli Nass, beruhigend, stetig ohni Unterlass.

Im Altersheim do git's erschi Ständli. S'ghörends d'Lüt und s'ganzi Ländli
und freue sich, trotz Räge, dra wie nur es Alphorn erfreue cha.

Erfreue tüend eus spöter d'Alderbuebe. Mit ihrer Musik händs gfüllt d'Rothusstube
und s'Gmüet vo villne Lüt. Soll eine säge, d'Volksmusik sig nüt.

Am Frytig hört de Räge uf . Mir freue eus und schnufe uf
Tüend interessiert de Alpebitter konsultiere und voller Inbrunsch degustiere.

Mir sind gstrigglet , gsteilt und putzt, in Tracht und Bluse, Hemp und Mutz.
Mit lange Hose, schwarze Socke, demit kein Ton im Horn bleibt hocke.
Die löhn mir usse a drüne Plätz; und – s'isch chum zum glaube – oha lätz,
nid eine muess a Rundi spende, will er d'Bänklialp het ohni Pause welle ende.....

Das intensive Uebe het sich g'lohnt. Hüt werde mir defür belohnt:
Uf em Landsgmeindplatz bloose mir voll Andacht und schön ;
am Aplaus und g'stiffetem Bier isch das z'gsehn.

Am Samschtig denn, ganz offiziell: s'Abschlusskonzert in Schwellbrunn/Appezöll.
Au das en Erfolg, a g'freuti Sach, und - dass i nid lach -
die dritte Alphornwoche do isch scho wieder z'End !!!
Träümet no lang dervo, wenn ihr wieder deheim pennt.

Friederike Thalmann